

四庫全書

集部

欽定四庫全書

集部

雲溪集卷

七至九

詳校官左中允_臣瑋五珠

主事_臣呂雲棟履勘

騰錄貢生_臣湯逢泰

騰錄舉人_臣李憲喬

欽定四庫全書

雲溪集卷七

宋 郭印 撰

五言律詩

聞車駕幸金陵二首

強敵憑陵極神天亦惡
盈一人知順動四海望
親征劍戟披霜利
壺漿夾道迎此行如破竹
不戰復三京

暫駐金陵蹕乘時更北轅
六軍思電擊萬騎聳雲屯
運協中天數人欣太祖孫
重恢文武境披莽立乾坤

居官一首呈大受明舉

未有林泉分紅塵且強顏最憐官舍僻不羨野人閒疎
密門前樹高低城上山偶逢佳客至縱步得追攀

贈時升

平生真樂處了不係窮通門對千山雪家饒四壁風聖
功細帙外文畧絳帷中富貴何為者邯鄲一夢空

懷莫少虛

把酒論文處操觚草奏時清宵仍夢到白日更心馳北

關山川邈西風歲月移歸期今已緩兩地一相思

寄馮當可

合散真堪笑回頭迹已陳交情元共月樂事不關春
委俗終遠已耽經亦醉人行藏隨所遇了此百年身

寄王褒伯和明舉韻二首

天涯初得子氣味巧相如地遠頻勞夢心通少寄書
月亭空想像風閣屢踟躕別後無窮意相逢只挽裾

會面知何日愁懷待一舒吾曹皆委運世事勿論渠故

國有喬木先人無敝廬岷山思共隱此計孰云疎

贈別何耕道

又作匆匆別能忘黯黯愁五年如隔世一日定三秋曉
雨莫驚夢斜陽休倚樓只憂豺虎橫君去善為謀

送贊可叅議赴臨安倅三首

春水歸舟疾秋天去路高乍辭王儉幕行佩呂虔刀畿
甸畧舒驥海門須釣鰲平生忠信在枕席過風濤

紛紛稱別駕天邑獨為榮日月光偏近雲霄路正平幾

年留楚峽一旦上蓬瀛
廊廟皆知已彈冠意氣生
亭上銜盃日江邊慘袂時
一年渾共醉萬里各相思
老得青眸顧心將白首期
青雲如在手故舊莫遐遺

書懷二首

奔走塵埃內拘攣筦庫間
是心能曠適何地不清閒
有客勸投絃無錢堪買山
尚憐耽寸祿理亂亦相關

四十行將至空懷晚歲憂
看書渾欲睡照鏡祇堪羞
開口舌猶在拂衣心未休
西風羨鵬鷃鼓翮占高秋

次韻蒲大受書懷十首

憤時唯泯默憂國漫咨嗟上畧思黃石中原望翠華散
才甘社櫟繫迹類匏瓜世事無窮盡吾生得有涯
時亂那能定民生不自聊鬢霜秋冉冉心旆日搖搖敢
違鷓鴣侶空貽猿鶴嘲眼前誰可意風月是清交

世業工看卷天資拙治生吏曹容小隱廩祿代深耕痛
飲中賢聖高吟適性情妻孥隨我慣自不厭藜羹

物齊人即我天運古猶今但得丹田固寧憂白髮侵情

忘心坦坦神定息深深却笑靈均輩悲哀澤畔吟

茅簷同廣廈野蕨當珍羞擬作蓑衣放寧為肉食謀沉思如有得寡欲自無求歎息吾衰甚年來不夢周

事業乖初願聰明異昔時病多難止酒愁極漫哦詩適俗非予好從人莫已知經營三徑就安用印累累

州縣徒勞耳春秋奈老何交游雙寂寞名利兩蹉跎帙散尤增睡盃行且強歌故人頻夢見誰道隔山河

日月當頭過風光轉眼稀宦游元自薄生計亦何微要

逐時情好難令野性違富貧同一飽幸有北山薇

世道交相喪從誰見典型聖賢雖泯沒簡籍尚丁寧學
欲追三代心終醉六經如何資發冢陂麥詠青青

蒲郎吾畏友詩句屹長城道義千鈞重功名一羽輕鄧
攸無後嗣盧老是前生世路羊腸劇君心若砥平

次韻大受過蘇仝道晚飲

痛飲忘形處清談得意時為憐非惡客還看出新詩交
道真難合人情豈易知林泉他日約杖屨且相隨

招耕道小飲

吏曹偷暇日聊喜一追陪
竹色侵書卷花光入酒杯
紅塵門外惡白髮鏡中催
適意成嬉笑人生得意回

月夜小飲贈別元允

秋天凝顥氣雲淨月流空
千里幾時共一樽今夕同
此君心似水照我鬢如蓬
別酒那辭醉行行太白東

次韻曾帥遣意三首

文章遊戲裏政事笑談餘
種就三田藥編成一帙書
情

忘心自適神定氣長舒四海曾夫子何人可學歟

庶民從號令喜若聽春雷頓却寒威退全呼暖律迴決
癰資砭石調鼎待鹽梅坐看罷癘俗眉間感額開

每入先生室欣聞所未聞心君降六賊筆陣掃千軍爐
鼎無人會刀圭與客分清齋時隱几閒看嶺頭雲

次韻李久善近詩四首

凜凜宸居壯胡為殺氣昏姦臣由一轍亂政出多門天
命何曾改朝綱本自存嗣皇真有志反手定乾坤

塵氛蒙帝闕國難古來稀惻惻民情見茫茫天道非愚
衷千慮切孤宦一身微萬里瞻行在神魂日夜飛
黃葉翻空舞西風又作寒懶將書帙整愁見酒杯乾物
理秋多感天文夜細看鸞旗猶未返一介敢偷安
高人來折節不免稻粱謀排悶唯詩卷消愁只茗甌此
時同幕府何日共仙舟氣味難相得逢君寫我憂

次韻杜安行見寄六首

世事驚遷改人生苦別離一年仍異地千里共勞思鴈

足傳來信蠅頭寫到詩丁寧林下意端不負心期

佳人秋水遠思憶破晨昏酒尚無同把文誰與細論心
交神自契目擊道先存他日如尋訪柴扉水竹村

擬作淵明去寧為祖逖先築廬須近水賣劍且求田短
燭窺今古清樽樂聖賢卜鄰真有意相與慶餘年

華顛何見逼強半百年身眼瞽文書過心閒藥物親衛
生元有術却老未逢人此道須君至寒燈子細陳

蝸居營蓋了一色草茅新庭砌繞容馬齋房可授賓竹

軒聊寄傲疏圃未全貧隣舍逢知己過從豈厭頻
我愛使君直使君憐我真短長才自異勞逸事還均意
在形骸外人疑手足親共嗟征賦急無術濟斯民

次韻宋正紀見貽

欲躡神仙境深窮道德經坎男元服素離女自披青有
意閒眠日無心出戴星但令爐竈煖丹熟自然馨

次智師韻

十年流宦海飄泊一舟輕敝屣世間事浮雲身後名學

幾為俗誤詩欲鬪僧清塵土非吾志妻孥強使令

次宋正紀見寄之作

薄祿謾婆娑朝家事正多天昏雲障日風勁葉辭柯黔
首難堪命蒼穹尚薦瘥中原戎馬盛壯士敢誰何

次劉子翼韻

逢迎欣晤語喜氣破嚴凝汨沒歎塵吏安閒輸野僧官
情元自薄俗眼莫相憎松竹開三徑他時我亦能

廣都世真上人南遊回見訪出羣公詩見示丐

予一語因思世間衲子盡是求佛覓禪底癡漢
遂作數語警之

法象森羅萬全歸一寸庵有佛平生礙無禪底處參烏
玄元自白茶苦本來甘前日南遊話看君作麼談

次韻杜安行嘉陵春日書事十首

老覺情懷別愁隨節令來草茅思雨露天地漲氛埃屋
雀春彌怨山雲晝不開何人知此意藜杖獨登臺

公退幽齋坐悠然對碧岑吹香花拂拂圍翠竹森森蝶

散紅芳歌鶯藏綠樹深吾心清似水塵境勿相侵

雨過川原秀烟光畫不如人情花動蕩春意鳥分疎
造化空陳迹乾坤一廣居小軒聊燕息夏屋正渠渠

圓吭高低唱奇葩赤白章每嗟官束縛肯放酒顛狂
幕燕終難穩池魚欲自藏宦游何處好山北是吾鄉

弱柳青垂縷新蒲紫作茸風光明老眼歲月養衰容
涸思詩難巧孤斟酒易供逍遙北山下一榻傲羲農

江路曾浮宅懸崖兩壁青晴烟籠小艇落照射高亭
花

簇紅粧岸鷗羣白點汀何時蓬底卧半夜酒初醒

誰念疲民瘠空令戰士肥羽書傳警急花院鎖芳菲冠
屨將身誤山林與願違兩途俱不遂衰鬢綠毛稀

舉世趨昏濁前賢慕獨清低回從客笑懷卷待時平彭
澤非難學菟裘且旋營樂哉莘野趣功業在深耕

良友何年會書來細作行栢寒知歲晚花落笑春忙從
宦愆行樂休心得坐忘神爐丹已就一粒待君嘗

聖處沉潛久心華始發明絕知人事繆頓覺世緣輕俗

薄天難定時危道不行折腰甘五斗無意問弓旌

次韻宇文德蒙春日道中二首

滿目風光麗春連幾處村江山挑客思桃李憶家園飄
泊流三峽窮通付一罇菟裘如可老歸去葺衡門

馬上花明眼寧知道路遐山橫千百嶺人住兩三家綠
皺吹春水紅舒抹曉霞箇中佳趣在何事苦咨嗟

感春

春光不覺老兀坐掩深扉寇盜時聞說山林未忍歸心

驚幽鳥語眼眩雜花飛何日乾坤靜餘生得所依

又用前韻

春事關心曲無人畫欸扉鶯猶求友嘯燕亦認巢歸物
色濃如酒風光駛若飛幽齋誰與伴窗外柳依依

次韻邵子文感春之什

海內風塵漲人間日月忙鬢霜催晚景孟蟻負春光聞
道花成錦空憐鳥似簧眼前朱墨亂無處話愁腸

晚春

三月韶華破東君誰送歸浮空新綠漲舞砌亂紅飛柳絮風初定桃花水漸肥羲和無計挽獨立又斜暉

正紀用暮春韻見貽復和三章

燕坐羣魔伏君心自晏然神仙真可學道術豈無緣健比凌雲鶴清同飲露蟬後天應不老何必羨彭年

萬形何苦役兩曜不曾停世事風中絮人生水上萍久能忘蟻慕聊自學熊經功滿他年後虬龍定駕青

自得無為理行藏異世人片雲塵外侶流水洞中賓思

慮何勞遣形神已覺親超然閱衆甫陵谷幾回新

三月三十日前人有詩云共君今夜不須睡未

到曉鍾猶是春再和前韻二首

案前韻
原本闕

風雨年年橫鶯花處處殘衰顏隨節變幽興與春闌俗
眼從渠白孤衷祇自丹平生知任運那復較暄寒

三春渾索寞百卉任摧殘有感詩頻賦無懼酒易闌調
和思玉燭延駐仗金丹難繫西飛日吾心一寸寒

五月十二日晚登平雲亭得平字齊字

路向林端出雲從屐齒生山風迎夕起烟樹接天平倚
杖聽僧語窺簷待月明幽禽知客意時送兩三聲

磴道穿喬木危亭喜杖藜郊原春樹暗井邑暮烟低日
沒牛羊下山空鳥雀啼超然塵世外身與白雲齊

五月十三日種竹偶成二首

開拓無多地栽培只數竿雲分千畝潤風送一窗寒坐
上清陰罩牆邊野色團課奴勤灌溉日日報平安

園夫扶出徑元是醉為媒密葉疎理纖根細細栽捲

簾斜日避倚杖好風來佳客如相顧還能伴酒盃

林下避暑

行道遭三伏流年當百殃
舌乾元少味體倦不安床
逃暑少寬舍沃焦無冷漿
時依喬木下俄頃得微涼

苦熱三首

纖雲都掃迹烈日正燔空
人立洪爐上魚遊沸鼎中
四山渾束熱一葉不吹風
屈指秋期近清涼四海同

宇宙何蒸溽山川久旱乾
浹膚惟汗雨脫腕是氷紈
永

晝固難避終宵寧暫安三農憂稼穡無物可輸官

南方炎瘴極所見異平生日月雙風蒲乾坤一火坑泉
源多水竭官道少人行却憶岷山底蕭然九夏清

熱

落日暑猶劇虛亭風不來半身流汗雨兩耳聒蚊雷扇
手何曾歇漿甌未放迴疇能呼屏翳一霎蕩炎埃

三伏不熱

三伏元無暑連旬雨復陰朝朝聞舊扇夜夜擁重衾日

晦浮雲翳天愁沴氣侵烽烟猶未息一念一傷心

立秋日出郊有感

霽色千山曉秋聲一葉風田原矜雨足杭芋報年豐
甲冑三軍解車書萬里同黎元如永息和義有深功

初秋

爽氣依辰至乾坤不可收林柯初脫葉寒鴈已賓秋
老逼羞看鏡愁多怯上樓只憂戎馬健何日隕旄頭

七月十三日對月小集

露坐仍盤筭澄澄夜色清酒如君子厚月似故人明短
舞天然態長歌格外聲歡情殊未極樓鼓發深更

七月二十八日蒲大受仲明舉偶來會宿三首

別袂無多日愁腸已屢回未便新舍穩先喜故人來憂
國空千慮忘懷但一盃相省情意好歸轡不須催

少城能款曲敝館辱留連未攪秋風思還同夜雨眠烟
塵驚絕塞草木驗流年斗酒君須醉新詩看百篇

秋風今夕好一笑偶然同時事難難際交情會合中青

雲渾作夢白髮也應公擬卜棲山計應為鄰舍翁

中秋日赴史漕賞月二首

秋色平分日開筵命月輪雲容休妬客天意解隨人平
地鋪寒水遙空絕點塵素娥來入座端不負良辰
此夕非常夕金波湧碧岑一輪初散彩八表盡傾心永
夜真同晝浮雲不蔽陰主人澄靜性萬古亦常今

中秋日與諸公同遊寶蓮院分韻得塵字

路出青山近招提更可人清心鐘磬響遠迹簿書塵晚

日池亭迥秋風杖屨親頻來一尊酒不畏老僧嗔

八月十六日觀月段氏亭次王師老韻

隱映孤亭小回環萬竹幽水聲喧暗谷月影淡高秋物
與黃昏靜人隨白日流一椽堪送老何必仲宣樓

山中九日

信馬幽尋慣重陽未及家清游貪翠巘素約負黃花縱
目心先折經秋鬢欲華因循時節過底處覓流霞

秋夜

萍梗何時定愁懷與夜長
新秋猶逆旅故國似他鄉
老馬頻嘶草寒蛩空殷床
思歸不成夢展轉及晨光

次韻費夢得晚秋感懷三首

日落秋風晚孤心正北飛
地寒戎馬健天闊塞鴻稀
翠葆幾時復青山百匝圍
何當身傳羽絕域問龍衣

搖落秋風晚淒涼又一秋
漢家元再造杞國謾多憂
七廟存餘澤諸公合遠謀
痛心何日定直待太平休

搖落秋風晚吾衰已一翁
不堪居世上寧忍卧山中
帷

幄人馬用塵埃帝尚蒙仰天無計出老淚濺寒空

欽定四庫全書

雲溪集卷八

宋 郭印 撰

五言律詩

早起待明詩

夜闌呼僕起四視有無雲天際星猶爛山頭樹未分蟲
鳴何限苦雞唱不曾聞欲驗東方白頻看掌上文

曉

客宵無一事達曉夢魂安窗隙簷光入更籌漏水乾田

園終計決游宦久心闌懶起趨朝謁從渠困馬鞍

朝來

朝來仍獨坐心事有誰知
啁鵲傳枝喜鳴鳩喚雨悲
整冠驚髮短覽鏡覺顏衰
白日堂堂去長繩不可羈

晝眠

齋館蕭然靜從容得晝眠
夢魂隨栩栩晝腹任便便
不把分陰惜能令雜慮捐
覺來神觀爽依舊閱陳編

不寐

自憐聞道晚習氣誤平生詩債幾時盡睡魔終夕輕語
言空自苦德業竟何成誓欲拋書冊茅簷適性情

新浴

新向蘭湯浴塵埃一洗清振衣心自喜出戶體還輕
水當年樂驪山往事驚昔人因悟道妙觸永宣明

見楞嚴經

夏夜喜雨詩

夜坐飛蚊息涼生戶牖中稍披風力快俄聽雨聲雄
癘疫千家淨炎蒸一夕空安眠知處處端的謝天公

值雨

慘慘雲頭暗繩繩雨脚垂定應來洒道不是故催詩熱
解非無益涼生正所宜多情如屏翳相戲即相知

久雨

四旬常苦雨秋令歎先行滴滴天垂淚昏昏日翳晴敢
言頻屋漏深恐害粢盛換甲明朝是人人望快晴

雨後

氣候西南異山川自一方暑殘秋更熱雨過夜初涼燈

火容綰帙詩書有錦囊更深猶不寐暗露襲衣裳

和趙彥和祈晴

靈宇祈昭霽還車已報晴
高空開曠蕩遠樹見疎明
踴躍增行旅歌謠徧耦耕
今年書大有香飯亦炊秬

喜晴

淫雨何淹久朝陽四望晴
雲收山骨露江落水痕生
豁豁知人意欣欣見物情
天公因屏翳勿使再縱橫

朝霞詩

矯矯明天末誰將絳帳供陰雲收薄翳晴日放先鋒道
路看行旅田疇驗老農乾坤今日意羣目散愁容

晚意

睡起書齋寂疎簾獨上鈎雨餘鷓鴣噪晚天濶鴈橫秋物
色供吟賦功名歎滯留兵戈今未息回首不堪愁

秋陰

天宇秋雲濶愁多日日陰山川相慘淡物色自蕭森鴈
失空中影鐘沉風外音分明含雨意何事不為霖

十二月十三日喜雪二首

蜀雪古來少天雲今始同
霏微初帶雨凌亂更從風
練欲拖平野鹽疑撒遠空
小民咸喜見誰復怨高穹

繽紛飛六出景色兔園同
桂樹非摧月楊花不起風
布銀成世界屑玉滿虛空
此地知豐樂如何荅上穹

次韻史才孺詠雪四首

始賀今朝雪隆寒特地嚴
莫愁窮戶閉還喜大田霑
黃竹歌休唱紅爐火屢添
華顛應處處早得是山尖

凍雲誰剪下天地已凝嚴試看郊原潤何如雨露霑
蓑寒愈重客舍恨猶添曉起空庭步深埋屐齒尖

陰陰彌宇宙黯黯一天同初訝銀為界元非玉散空夜
迷連皎月曉舞助嚴風真宰憑誰問年來物未豐

怪得天飛雪寒威曉不同練光鋪迥野玉屑下長空片
片梅花雨團團柳絮風人間呈瑞應還喜兆年豐

出郭

步屨尋春去郊原協氣薰野花隨路見幽鳥隔山聞興

遠連芳草心閒對白雲忽忽殊未愜落日噪鴉羣

出郊

官曹拘束久出郭便忘歸江濶風烟澹山稠草木稀客情隨處好鷗鳥自由飛塵事聊相放吾心一寸微

留宿田家

遲落前溪水田家借一椽容身函丈地闔眼濕薪烟馬飼牛欄下人眠狗竇邊此行頻窘澁吾意亦安然

晚望江南

野豁長江外人家各自村水光秋蘸樹雲色晚封門引
眺頻搔首行吟只斷魂可憐新月上烟靄又昏昏

再用前韻四首

灤界東西境人分遠近村關頭千古路夾口百川門風
定江知性雲開日返魂客愁秋更劇一望一神昏

殘日銜西嶺輕烟幕晚村朝宗奔衆水設險壯重門恍
惚裏王夢淒涼蜀相魂山川長不改人意自朝昏

身留瘴癘地家住水雲村何事懷三徑無才叩九門秋

風吹旅思夜雨滴歸魂
目斷岷峨路烟深夕照昏
學道與時背從人笑我村
太清元有路大易豈無門
把定金公性收還木女魂
屯蒙循兩卦返照驗晨昏

楊村道中偶晴

童僕喧喧語籃輿十里輕
雨收沙路淨溪漲石灘平
疊嶂千峯秀殘霞數道明
秋容誰可狀一洗客心清

次韻南伯唐福道中

宿雨郊原潤晨風草木涼
村醪饒客醉山鳥笑人忙
石

金史卷八
卷八
罇泉能潔籬根笋自香復與終日倦惆悵舊林塘

留雲安驛詩

五日留山驛塵無一點新瓜瓞惟有醬麴米不成春默
坐深調息狂吟枉費神箇中真趣在畧得自由身

過銅梁縣有感為住半日

攝職臨茲邑于今五十年吏胥都往矣井邑尚依然指
目身曾見談論口但傳人情猶可喜能不為留連

到巴川縣日熾不可行遂留宿用明復留題韻

避暑巴川館憑欄瞰水漬馬牛紛浴汗鵝鴨亂翻紋潦
濁難為鑑天昏不辨雲清泉何處是一卓飯吾軍

遂寧縣道中路平日熾

赤日射平地青天卷片雲汗流疑是浴氣烈正如焚食
鼎荷湯鑊輿衣蒙火裙幸哉無內熱不使躁為君

未歸

宇縣干戈滿何人不念歸死生雖有命進退合知幾巖
壑空搖頰塵埃少拂衣吾今同一轍慚負故山薇

將歸

兩載春風客翩翩憶舊棲林深喧鳥雀水暖亂鳬鷺到
處宜傾榼逢人數杖藜荷花難負約飛語報雲溪

離三節鎮日色正盛頃間雲起陽鳥不見終日

清涼

忽訝雲峰合渾忘暑氣侵垂天真有意籠日豈無心行
旅人人悅空山處處陰更期頭上黑相送到溪林

舟中早起

迤邐東方白猶餘數點星
亂鴉啼古木宿鷺起寒汀
日襯殘雲赤烟含遠岫
青江山無限思不覺是飄零

舟中遇雨

小舟初別岸一雨送斜風
點點圓生暈聲聲碎打篷
雲山交慘淡烟樹遠冥濛
有客披蓑坐憑誰作畫工

舟中雨霽

雨聲收浙瀝霽色起瞳矐
山頂雲蒸白江心日射紅
澄波還古岸宿霧掃遙空
更喜前程快扁舟得順風

舟中見月

濮上今秋月於人太有情銀盤隨水湧素練截江橫岸
濶天猶近船虛夜自明寒光連上下萬里一心清

和榮安中月明夜行

驅車夜出城佳月傍人明始向山頭見還同水面行問
途幾一舍投宿已三更露濕衣裘冷吾生笑自輕

過石門灘

長江風雨急巨石虎狼蹲水自分三道舟唯過一門細

觀真眩目平下亦銷魂忠信知堪仗兒曹不用喧

栗臯峽遇風

平生知任運一切聽天公身世浮江木功名水上風
聖人齊覺夢俗士較窮通眼底無窮事飛花本自空

樣舟

裊裊垂楊岸無人獨樣舟風波嘗險阻身世任沉浮
邃徑中間接寒溪左右流冥心來宴坐浩蕩得天遊

雲溪雜詠

并序

予性嗜水竹欲卜一畝之園而貧不能有日經月營
踰二十載乃得今所謂雲溪者過初望馬雲溪直衝
門越官道不能五步脩竹半頃西瞰大江各因其地
為亭為橋為臺為沼為虛舟為小閣亭曰雙清以其
面揖清流腋背叢篁也橋曰浮翠以其蒼筤拱衛下
跨長溪也齋曰虛舟以其二水夾流如片帆之泛湖
海也野望空曠遙岑隱隱則曰遠色閣春輪日飛汀
鷗時下則曰忘機臺沉潭不流神物屢見則曰龍淵

地勢突起植蕙滋蘭則曰蘭坡其餘景物變態千狀
未可以一一紀長林之表又有平陸於是藝百卉樹
衆菓目其亭為和光以示不敢離世異俗膏肓於林
泉者也甫成賓友來遊詰其所以命名之意且索惡
章俾未治者觀焉因得古律詩絕句十五篇詞淺意
陋姑道其所見云耳若責以詩人之義予則有愧紹
興甲戌二月初吉亦樂居士郭印序

案古詩絕句依
類編入別卷

入門何所有彌望祇林泉塵垢人間世雲霞洞裏天間

亭藏復見小徑絕仍連勿說桃源地幽深自一川

俗客尋常少珍禽自在啼一溪如練淨萬竹與雲齊縱
目心貪看回頭路却迷清游殊未足日下小橋西

好景發天祕幽情得快哉亭從江上見路向竹間開有
客相將入無人獨自來芒鞋元準擬和雨踏蒼苔

門前車馬跡籬內水雲鄉分委江流駛通幽徑路長一
池擎茁茁萬竹聳蒼蒼誰謂蓬壺遠紅塵官道傍

林園無俗物滿目是琅玕非霧晝常晦不風夏亦寒流

塵終日背歸鳥一枝安但看青青節肯隨黃葉殘

右雲溪五

首

竹色琅玕立花光錦繡舒物情奚得喪人意妄分踈汗
淨川同納嫵妍鑑本虛和光聊復爾看取未形初

右和光亭

首一

步屨尋幽勝亭邊水竹饒地令人事遠江遣客愁銷自

是塵難近誰云隱可招洞天無別景於此日逍遙

右雙清亭

首一

小橋藏曲折幽徑一溪分旭日篩金影春流展轂文周遭無限玉參錯幾重雲覲面融真意相知祇此君

竹裏虹橋見葱葱翠氣浮枝交籠短岸葉落赴寒流索莫終年計徘徊竟月留清涼宜避熱風色晚颼颼

一到平橋上蕭然淨客心兩邊風細細四面竹森森更

喜清流駛寧容畏暑侵我來歸不去日永鎮長陰

右浮
翠橋

三
首

虛舟橫沼面窗戶四玲瓏絳宇三山上青天一鏡中夜

深楊柳月日永芰荷風公退渾無事江湖興莫窮

右虛舟一首

首

小閣供遐眺凝眸萬景間江流連曠野林杪出遙山思

遠憑欄外吟成倚杖間乾坤無盡藏造物豈容慳

右遠色閣

首一

道眼全無障機心了不生園亭如著意物色豈留情水

鳥元相狎淵魚自勿驚超然忘我見萬化各天成

右忘機臺

首一

寒潭深百尺，潛物晦其真。
雨施時為潤，淵居每自珍。
飛騰應有道，變化豈無神。
直待功成日，驅雲上紫宸。

右龍淵一

首

生植依山谷，移根伴此君。
叢中抽紫幹，幽處吐清芬。
入

室能俱化，同心自遠聞。
靈均元不試，妾佩楚江濱。

右蘭坡一

首

和韓道濟見示雲溪之什

水竹吾廬勝，幽遐不用尋。
秋江分浩渺，夏日閱沉陰。
野

客敲門者騷人倚杖吟
僉言清入骨坐久髮毛森

劉誼夫見寄雲溪之什用前韻

閒情從杖屨幽意滿林塘
秋近氣先冷春來風自香
芷蘭成佩玉茅葦當雕梁
一念渾枯木能隨柳絮狂
身墮樊籠裏心遊浦溆邊
晚風傳牧笛落日漾漁船
山接無窮樹江連不盡天
憑誰圖此景髣髴似斜川

歸雲溪三首

才入雲溪境欣然面故人
江郊寧改舊竹樹更增新泉

石重為伴樵漁永作鄰丁寧魚與鳥久出幸無嗔

林園三載別相見不相猜燕雀垂空下龜魚近水來但
辜新笋約猶及白蓮開從此休官去風光日共陪

蜀道溪林勝無如此地先兩溪光練練萬竹翠涓涓世
謂齊盤谷人言過輞川吾生聊樂耳何必問前賢

題謝園二首

邂逅成幽討徘徊慰賞心長江連遠色喬木借清陰亭
暗蘿垂幄林明竹散金爛游須愛日羲馭去駸駸

林柯初脫葉江國便知秋鴈過如將信鷗眠不避舟一
丘終未遂五斗祇堪羞不有樽中物憑誰破客愁

和仲明舉幽居

薄遊心已倦幽築興何長夜雨千畦菊春風五畝桑雞
豚還自樂人我亦相忘黃卷皆吾友何憂日面牆

欽定四庫全書

卷八

欽定四庫全書

雲溪集卷九

宋 郭印 撰

五言律詩

歲寒堂

草木摧枯盡窮冬獨後凋堅姿工傲雪直幹上凌霄煙
色蒙高蓋風聲漲晚潮只憐桃與李一向媚春韶

貴和堂

臨池高拓地軒檻直前開樹影簾中入荷香坐上來更

閒休案牘客好共樽罍再稔民和樂嘉名亦稱哉

獨有堂

至道渾疑獨頭頭豈或遺塵中如默契聖處自深知一體珠多貫多方路蓋歧未能融物我難與詰希夷

題費氏清餘軒

聞說南軒下澄然洗客心不風蘭自馥非霧竹常陰簷影閒雲過櫺光淡月侵興來誰與語撫弄膝間琴

邛州西巖軒閣陋甚掄仲知府舍人侍殿撰公

來游惜其頽敝乃更新之既成以書招印同游
因成一章

鶴山爭攬勝此地獨超然秀巘脩屏立枯崖半屋懸團
雲饒翠竹鳴玉落清泉自得高人賞佳名日益傳

酴醾閣

春風高閣上雪片又能香琢玉全天質施朱笑晚粧梅
花如許瘦柳絮不勝狂況此偏宜釀逢人問酒方

諸葛公則延登書閣出示焦丈通直洎諸公所

贈詩因成四韻

落泊麤官冷婆娑小閣深身勞常簿領興在即山林幽
砌封苔暈虛櫺過竹陰眼前無限意清賞得知心

野亭

一到幽亭上蕭然淨客心竹深風細細栢古氣森森畏
日背斜照珍禽共好音未能還小隱即此是山林

繞紅亭

燕脂新染出剪刻費天工葉少何妨綠枝繁不厭紅綺

霞當眼爛風雨轉頭空唯有亭前竹青青四季同

陪元允大受游天寧寺三首

炎暑何從避城隅古刹幽故人今再會勝地昔曾遊雲
合天容暝風來客意秋歸途催暮雨回首不能休
拉客遊蕭寺徘徊及暮還自非歸沐假那得片時間閱
世真成夢為官祇強顏老僧應笑我何日遠塵寰
古人來會合蕭寺喜麤連久坐頻更僕留言悉契禪塔
高延晚照楠容易昏煙欲去仍回首西風為慘然

天寧晚集

僧寮便坐卧觸目興何窮庭竹留斜日瓶花怯晚風分
無依寶社心已脫塵籠回首人間世枯榮一夢中

遊金地寺

山行無近遠絕頂是休程度石籃輿怯穿雲屨屐輕林
篁當路迸泉水落溪鳴更宿招提夜寥然一境清
得得來幽寺山靈為洒塵談禪饒釋子覓句讓詩人好
癖疑驚俗機忘始見真平生丘壑志舍此更何親

下巖寺

雲安欣及境小刹為徘徊殿閣隨巖展軒窗向水開僧
雖持鉢出客自艤舟回欲住無留計幽懷亦暢哉

遊靈泉寺

人日訪山寺春風能借溫柳橋通一水栢徑隱重門泉
竇來何處梅花別有村從容尋後約假榻卧雲根

再和

四面林巒匝風喧未覺溫曉晴雲度嶺夜靜月侵門地

金
卷九
秀古今樹人嬉遠近村細觀羣動性各各自歸根

宿大明寺

歷覽成終日禪房處處深野僧應怪見俗客可幽尋
煙竹寒垂幄風松靜鼓琴清談不知寐明月到天心

游涪州普淨院

城郭欹斜建人家高下居扁舟挨古岸別棹過僧廬
祠識伊川像堂標魯直書

紹聖中程伊川謫居此作
易傳黃魯直榜為釣深堂惜哉

橫一水游子亦來踈

次韻明法游法相院二首

市近清江隔林深古寺幽竹光濃欲滴山色翠交浮咫尺人稀到尋常客共遊機心吾已息來往不驚鷗
禪扉塵不雜景趣自然幽黛色排軒入仙香繞殿浮傍
林滋野興出郭契清游歸路風埃起眠沙愧白鷗

次韻蒲大受瀛游富仁院二首

衲子幽棲地青山繞四旁林昏知暝靄溪暖覺遲陽泉
石關心久風光引興長春雲多變態天末淡微茫

脫屣塵埃外結廬猿鳥旁松門深掩月花塢靜含陽
歌枕泉春急焚香晝景長我無林壑分世路祇茫茫

宿香蓋院

溪橫門半掩日暮客來過翠竹庵前密青山閣上多
景宜閒裏覓詩向醉中哦回首風塵滿明朝事若何

過謙上人房

小房藏曲折客至不應門種竹無多地分蘭却數盆
禪心初默契道學更深論世路悲流浪因君一反源

僧房午睡

客館饒秋思，僧房愜晝眠。
納涼仍古殿，濯熱更清泉。
得失渾闕命，行藏只聽緣。
安能隨世態，膏火日相煎。

游酆都觀二首

兩漢神仙宅

前漢王方平後漢陰長生於此山煉丹飛昇

千年道德鄉祥雲

連野潤巨栢，亘天長陳迹。
遺蕭爽高風，接混茫凝情丹。
竈冷無處問真方。

仙籍平都化，今晨喜一過。
彩雲空洞穴

陰真君道成日洞中五色雲扶

起古木上藤蘿龍勢山盤轉禽聲日咏歌我來思際遇
亭下久婆娑

游思安鳳凰巖

山脚清江轉巖腰細路通飛泉忽濺雨陰壑自吟風寺
隱烟雲裏人行竹栢中野僧無箇在幽鳥為談空

合州濮巖

背郭二三里林巒迴出羣千巖蹲古佛萬木駐寒雲樓
閣侵天際烟霞謝世紛登臨不忍去回首日西曛

題岑公洞

岑公來避世甲子十周年

隋末居此

夏屋虛巖豁神芝結乳

懸木喬從昔種香信至今傳

寄香與客人事見本傳

學道能堅忍

何人不得仙

采真洞

竹洞深深處斯游契采真故來非俗客同道是幽人日
暗能休影風清不受塵行行無限意滿目漲脩筠

和張方回西湖二首

房公巧栽植花發四時春有竹能環水無風不動蘋人
已留粉像客至謝紅塵梅柳年年色相看白髮新

叢筍深翳景草木未知春晴漏林間日寒生水上蘋繁
紆通邃徑寂歷遠囂塵更渡長橋去無邊物色新

和何子應遊金壁池二首

才華思哲匠魂夢繞幽塘舊館隨人勝新荷特地香煙
深喧脆管水淨蘸浮梁安得雙飛翼尊前一醉狂

徜徉清水曲盼戀綠楊邊欲並師商席同登傳說船萬

荷薺舞扇一葦獨行天滿目江湖趣無勞涉大川

和元汝功登城有感

荒城綠蔓草峭壁累臙嵯

山名白鹽故云

山木秋尤少江雲晚

更多寺烏千點集塞鴈一聲過錦水歸心切漁衣負綠
蓑

城上

晚目層城上山川自吐吞斷雲孤嶺秀漲潦一溪渾煙
起誰家樹人歸何處村不堪東北望回首又黃昏

登呪土寺東臺

尋幽通野寺訪古得危亭
木偃千年蓋山圍一面屏
登臨徐發興蕭散偶忘形
倚郭繁華地斯游喜屢經

書臺

崛起扶劉氏兼資將相才
臣心雖自切天命若猜古
壁空遺像荒榛只舊臺
斯人今不見落日更徘徊

西臺

高臺垂四顧遺冢閱千年
烟樹孤城外雲山落照邊
崢嶸

巖餘巨石慘淡接平川往事誰能說憑欄一悵然

凌虛臺

高臺收晚照遠思浩無窮竹裏清飈泛山高翠靄蒙九層平可上一徑曲能通誰揭凌虛字名浮亦未公

御風橋

此地多虛曠飄然欲御風雙鳬疑到闕一鳥似翔空本是仙家事元非幻術功金丹成就日白晝自飛冲

衆香橋

標名何所謂物色正相當堆雪醪醕潔披風茁茁香菊
從秋後發梅向臘前芳眼界無多地縱橫亘十方
佛有衆香國

無盡橋

曳杖徜徉去仙家洞府中寒流清自繞幽徑密相通著
處亭皆穩看來景不同是名無盡藏具眼飛和融

張持道生辰三首

妙喜生摩詰長庚夢謫仙寶階三道降涼月九分圓黑

髮功名地紅塵世俗緣乾坤思整頓休慕竹林賢

幾下陳蕃榻常窺孔氏墻玄通融釋老廓落傲羲皇永
祝千齡壽從今一瓣香玉枝長不汗莫問鬢邊霜

咫尺桃源路乘閒許杖藤高談六十劫閭室百千燈邀
月公揮手眠雲我曲肱洞門初不鎖俗客豈容登

輓故楊叔強承事詞

家事毋關我心君日日休陰功歸子息賢德視交游彛
鼎千年古圖書一室幽榮封胡不早只許到郊丘

故于泰和輓詞

藝圃收名早如何亟賦歸肩摩青佩久心念白雲飛屋
有詩書潤家因孝友肥二雛行展翮休復憤儒衣

家夫人輓詞二首

嬖彼閨房秀泠然玉雪容月簫難擇對石窕侈䟽封涵
泳詩書習扶持扇枕供三荆方擢秀雲壑卧雙松

熊軾人將達魚軒樂未央遽令雙劍化併作一丘藏筆
絕先秋句衣絨故篋香未應林下女千古擅清芳

明復作文房四物詩因用其韻

銳精文字裏今古歎毛錐職在中書貴功因大手竒楮

君頻借重墨客最相知絕迹頭童日麟經萬世師

右筆

琢就陰崖骨良工用意勤治心初受水鏡面已生雲自

比珪璋質能成翰墨勲千金酬重價端石世傳聞

右硯

結繩嗟已遠書尺濟斯民汗竹功猶淺香皮世益珍庶

方能潔已舒卷解隨人一自逢毛穎交情日日親

右紙

筆陣須罄甲輕煙久祕藏犀文誇妙手魚腹驗真方製

就玄圭象磨成點漆光東齊吾注易誰遺一九香

右墨

竹杖

長短身為度洪纖節自明時時勤執捉處處伴經行峻
岷腰能直危橋步亦輕化龍他日事靈壽若為榮

竹夫人

林下風流在收歸枕簟傍冰肌元本淨玉骨自然涼最
是虛心好由來正節剛炎天長作伴晝夜不能忘

藤枕

剡藤新織就一榻共清涼琥珀珍難得龍頭貴莫當不
辭拳石冷寧羨錦囊香夢覺華胥樂神怡四體康

蘆簟

炎方需此物收蓄遍家家致用同桃竹勞工笑象牙雖
無花色麗却見水紋斜展卧南窗下蕭然興莫加

梭拂

一色梭櫚造收成掌握中青蠅應退舍白鳥

蚊也

敢爭雄

便作龜毛用

祖師有龜毛拂子

寧殊麈尾功世情分美醜達者

自圓通

紙扇

裁成方絮後涼意便相親烈日工遮影飛塵少汗入襟
披殊覺快掌運莫辭頻紈綺徒觀美論功曷比倫

見牆間竹影擬而畫之終不近也

東牆纔過午寫此此君真日翳倏無跡雲開俄有神因
緣咸自爾形似竟誰親筆墨有非偽天公恐笑人

孤鴈


誤逐衡陽暖輕逃塞北寒偶分千里伴翻羨一枝安兄
弟今何許家鄉路若干飄零歸未得淺渚戢脩翰

蟋蟀

秋蟲推爾傑風韻太麤生哀草年年恨寒砧夜夜聲軸
閒催婦織衣薄念夫征誰謂心如石歌眠不掛情

山茶

嚴冬能獨秀渾不藉春風葉自經霜碧花應鬪日紅望
中幾眩眼高處欲燔空安得栽培手移根向邑中



欽定四庫全書

集部

雲溪集卷

十至十二

詳校官左中允_臣瑋五珠

主事_臣呂雲棟覆勘

謄錄舉人_臣李憲喬

謄錄舉人_臣楊 昭

欽定四庫全書

雲溪集卷十

宋 郭印 撰

七言律詩

上政府五首

王室當年若綴旒
片言戡定出奇謀
臨機勇決千鈞弩
濟險優游萬斛舟
掌上回旋皆造化
毫端升黜是春秋
蟲魚盡喜乾坤泰
宇縣寧聞杞國憂

塞上煙塵永不揚
邊民戍卒盡耕桑
抗言用武真非策

唾手扶危別有方
須信精誠能感格
由來道德本安強
恩沾動植知多少
天使千秋保熾昌

政和乙未對彤庭
袖筆曾陪四海英
三十七年渾夢境
六千餘里邈神京
大鈞播物無垠際
小錄搜才有姓名
屈指西南存者幾
成都首縣一孤生

三紀徒勞祇療饑
年踰耳順已知非
行藏有定隨緣過
功業無成與願違
里閭儻能乘駟入
君門便欲掛冠歸
交朋親戚猶相慶
要看桑榆晚日暉

起家白屋忝為郎俯視同儕道亦光已幸十年紆赤紱
猶期一日坐黃堂紛紛奔競真成笑兀兀蠢愚但守常
不是坤輿能厚載敢干斧鑕獻猖狂

上魯安撫二首

萬口爭稱好使君攜持踴躍看朱輪入門便灑隨車雨
到處真成有脚春魚鳥一時生意氣江山千里有精神
大賢易鎮朝廷重巴峽窮愁要撫循

聖門鼓瑟妙難窺今日風流親見之五紀光陰驚電掣

一生忠孝仗天知老莊座下須聞道李杜壇邊敢說詩
晚景功名非所慕樞衣深喜得宗師

寄何修撰

向來祇欲返荆扉老大趨時意頗微官路波濤猶洶洶
家山桃李自依依剗心擬出陰陽表委質難逃造化機
寄語當年蓑笠友樵漁素約敢相違

上鄭漕二首

窮經好客舊時聲千載遺風見典型忠孝家傳心自赤

功名路穩鬢方青，傅巖欲作商霖雨。
蜀道猶觀漢使星，小益提封重試可。
定膺鋒召入堯庭。

孤迹平生似轉蓬，少而豪邁老羈窮。
榮華路上黃梁夢，英俊叢中白髮翁。
身墮窮山三峽裏，心隨流水大江東。
黃緣展翅斜陽晚，須仗扶搖一鶚風。

送張道從上行起復帥夔二首

初辭丘隴重哀榮，旆卷春風第一程。
帝委才猷專外閫，人推勇略過長城。
孤忠炯炯能移孝，溫詔諄諄遽奪情。

三峽壺漿應滿道江山草木舊知名

白帝層城統十連肘聯荆屬阻山川翠華久暎舟車會
紫詔先收柱石賢雪淨已通梁閣道浪平空艤漢樓船
不妨腰經登廊廟典故先朝尚宛然

送鄭宣撫三首

棹發嘉陵即帝庭山川草木若為情忠嘉但有三千牘
威愛猶傳十萬兵天象共符虛右席坤維一帶失長城
西南所繫安危大何止雪山分重輕

凜凜風霜鎮玉關
文經武畧自優閒
蟠胸浩氣吞雲夢
蓋世英名重泰山
憂國屢形詩句裏
折衝長在笑談間
四川父老攀依切
猶問牙樁幾日還

朝路年來似奕棊
惟公出入倍光輝
昔時裴度臨軒遣
今日曹參促詔歸
蜀棧雲橫星騎動
楚江天闊錦帆飛
祇應太史朝朝奏
迤邐台星近紫微

送戴子厚赴張夔州之辟

半世婆娑厭宦途
時危結綬計何迂
非干避地遊巫峽

且欲從軍捍蜀都巴水秋深添別恨金陵天近試雄圖
平心勿管風濤惡陰有神明巨力扶

送邵公濟溥赴省二首

天府登賢策馬東似君人物許誰同文章小技出兒戲
道德微言餘祖風有路青霄元自別無情白髮向來公
平生醞藉唯經國唾手先收第一功

凜凜霜威撲撲塵不堪曉騎送行人雲山萬點遠連蜀
煙樹兩行初過秦風厚正能扶大翼浪高端足化脩鱗

聖君急士思調鼎喜見寒梅漏洩春

次韻喻存道二首

訪道尋師積有年晚逢夫子嘆高堅玄關啟處功深矣
妙指傳來意豁然氣會三宮馳聖轂理歸一轍棄塵編
工夫到後神明出奪得天機運用權

神龍一去渺無蹤落日孤雲為慘容溪遶練光秋更白
黛橫山色晚尤濃細看風物曾經眼深達根源自點曾
寄宿僧寮清不寐一輪明月掛枯松

次元汝功韻贈王恭之

四海車書未混同，憂懷都付酒盃中。
雲雷自昔開屯難，天地于今合泰通。
濁酒寒燈招舊友，清江小艇憶詩翁。
人生會面真難得，莫遣行裝犯曉風。

次宋正紀韻

釋耒隨人干斗祿，因循五閱閏餘年。
折腰每效官三品，餬口深慙食萬錢。
未夢登天生羽八，肯希舐痔得車千。
求田早決歸耕計，種秫何妨釀酒泉。

次韻正紀見寄

栖栖奔走不知春，日月無停疾轉輪。
塵土強顏成俗吏，林泉放意屬高人。
書題繾綣情何切，詩律雄邁語不陳。
引起歸心千萬緒，向來夢寐幾翻新。

次韻正紀見貽之什

解紱歸來旋葺居，身安環堵不求餘。
麤羹美糲飯偏知味，談話寒燈勝讀書。
情實欲開先自窒，心田已淨弗須鋤。
親朋有酒且呼喚，萬事何妨一破除。

次韻嵩師彥正留別

兩公清氣入人肝，玉樹森森逼我寒。
揮麈繽紛驚落屑，和詩來往疾跳丸。
興餘不管牙籤亂，坐久翻憂蠟炬殘。
輕別莫言吾所諱，重逢應作老翁看。

次韻余時升見招

老大逢春意，轉微追隨不復似。
當時憐君舊已開三徑，顧我今方卜一枝近水遙山元自好。
暖風遲日更相宜，便當乘興尋花去。
免使園林恨失期。

和趙茂州即事六首

千巖萬壑最幽深
玉壘西邊古茂林
仕宦不妨真大隱
風流無伴只孤斟
多情竹色朝侵几
適意松聲夜入琴
莫道使君無一事
每勞幽思發清吟

邊城贏得自由身
富有江山豈是貧
水榭晴雲來几席
月庭香霧濕衣巾
已邀松竹為三友
更列圖書作四鄰
不會世間機巧事
無思無慮樂天真

人事都無喜宴安
懶於喧處競追攀
驚殘午夢風推戶

壓盡炎威雪滿山無主巖花時解笑近人林鳥亦知還
應憐朝市區區者方寸何曾頃刻閒

官居閒寂似僧居坐卧行藏得自如爽氣逼人千畝竹
清風滿室一床書心游淡泊能調馬意絕貪求豈羨魚
即此便同三徑隱未須投綬賦歸歟

前世愚夫哂鄧通即山鼓鑄死饑窮貪名勿羨青雲士
守道甘為白髮翁日月奔馳駒過隙乾坤跼蹐鳥居籠
反觀自有超然地能使淵明立下風

所欲誰能矩不踰人生七十在須臾縱橫竊鄙張儀詐
懷卷終思甯武愚幸有精神延短景了無才力奮雄圖
手提造化非難事井底寒蛙祇自居

諸友和章及性宗用韻二首

服田力穡是良農鹵莽耕耘報亦同得道正從勤苦裏
了心只在剎那中六通四闢非關學萬別千差不見功
法法滿前供受用更於何處覓家風

千花百草鬪青春法界誰知本一真生滅去來渾妙用

洪纖曲直現全身參同聊示師資契授受寧論父子親
直下承當猶自錯可憐舍已更從人

宋子淵有詩及性宗事用韻寄之二首

還淳反撲似山農與物相忘即大同造理自超言意表
發機不離見聞中批雲切月能無事轉地回天別有功
公案見成何必舉請君於此嗣宗風

枯木寒巖但不春直經千劫未為真一門超邈難尋軌
萬象森羅獨露身田地穩時行便到工夫盡處見方親

韓盧逐兔紛紛是言語支離最誤人

康子思二詩有問道之意和其韻

稟生太極本純全七尺身中豁一天妙道高深從俗笑
至言微密向誰傳何須青簡書勲業賴有丹臺集聖賢
諸子但論時世事令人懶語益思眠

少陵詩有世情只益睡

要作通天一大儒措心寥廓未為迂神機應變無多子
聖域知歸不遠塗哮吼定應潛百獸啁啾終是笑羣雛
吾今欲覓衣中寶活計須教一物無

贈王君詔道人

潤屋金多笑不居却從象罔索玄珠
千年古鏡心長靜
萬里飛雲身自孤
空裏結空空復有夢中占夢夢元無
休將此語輕傳泄舉世冥行少丈夫

卜居

只憂短髮變星星
早葺生涯寄暮齡
二頃可能輕相印
一區聊欲著玄經
不嫌野水侵扉綠
更喜寒筠遶屋青
投綬歸來成底事
要驅龍虎遁天刑

次韻楊信仲見貽郊居二首

平生不喜入州閭，林下江邊謾卜居。
解榻延賓同笑語，杜門教子讀詩書。
最憐舍後蔬盈圃，只欠庭前水繞除。
官路嶮巇端可畏，茅茨固就早懸車。

野老樵夫作比閭，儒宮一畝亦安居。
澆愁剗買村前酒，引睡頻拈架上書。
江近雲煙長到戶，人稀鳥鵲自馴除。
不才已分時流棄，猶幸能延長者車。

次韻王德夫晚晴郊行之作

天含愁思雨冥冥
晚色雲銷萬里青
幾點沙鷗臨水鏡
數重煙樹簇山屏
雅聞樵採能談道
欲耦鋤耰更問經
藜杖芒鞋先有約
相從避世免深刑

次韻師時發溪橋晚眺

卧溪古木勢蜿蜒
佇立斜陽旅思寬
湍沒岸痕知漲溢
風生水面覺清寒
靜容桃李敷濃蔭
暖放鳬鷺浴短翰
隱約渭濱真髣髴
行藏都付一漁竿

和師時發荷亭晚飲

榴花灼爍半空開
天外薰風入座來
雨掠南塘荷蓋淨
雲埋西嶺日車頽
物情榮謝看詩句
時世安危付酒杯
好是溪橋最清絕
淡烟寒水一遲回

憲司後園葺舊亭榜以明秀元少監有詩次韻
爛漫煙光一目收
危亭葺就壯岑樓
三巴故國山川在
萬古長空日月流
江水奔騰無晝夜
石田耕穫漫春秋
興來筇竹隨兒輩
徑路平生不慣由

再和四首

萬象森羅不可收一亭覽盡勝高樓
塗山南觀尊喬嶽渝水東朝合衆流
煙起人家天欲暮雲歸海嶠月當秋
此時此景尤佳絕約客重來信有由

東皇物色未全收山半登臨當倚樓
錦里煙光渾在眼雲溪花片亦隨流
夕陽正好無多景春序纔移已復秋
却憶故園林壑美乘風欲去問何由

皇家故境未能收愁絕登城與上樓
目斷東吳心已往神馳西洛淚先流
江山環合成茲邑霧雨溟濛即是秋

賴有聖賢同一中忍將時事說元由

天際油雲不肯收全妨寓日向層樓日車難把長繩挽
春事渾同去水流可奈餘寒猶作沴懸知徂暑未能秋
此方記得偏炎熱路入夔門一再由

仁壽縣後有亭余名之曰明遠賦詩二首

虛亭突兀枕崇岡玉宇無風秋自涼地濶羣山爭逶迤
天低遠樹立微茫陰晴易辨雲霞色曉夕常吞日月光
我亦清心官事省葛巾藜杖得徜徉

小邦人物大邦同萬屋鱗鱗氣鬱葱誰挈神峰離海底
幻將塵市納壺中垂簾擬學山陰畫飛鳥難乘葉縣風
舉首穹旻纔一尺敢憑正直謝天公

爽襟亭

西岡獨上每春容天接危亭四面風萬室鱗鱗歸眼底
一峯岌岌倚雲中地靈人勝風流古石秀山回氣象雄
曳杖頻來無別意喜觀禾麥又年豐

次韻劉文饒題絕塵亭

江白風清古寺虛客來蕭散興何殊
水涵疎樹千尋淨
塵到幽亭一點無
天際昏烟迷小艇
林端落日射浮圖
欲添楚嶼深秋意
好向沙洲養橘奴

雙清亭

鑿開蒼翠著幽亭
正取澄江一鏡平
嘉木千章垂倒影
支流三道咽寒聲
橋橫古路肩相屬
雲襯斜陽眼自明
竹色波光交借重
照人心骨有餘清

龍洲橋亭新成

溪淺橋橫趣自幽坐來風色晚颼颼寒泉有韻石間出
遠水多情竹外流地僻蛟龍時隱見天晴鸛鵲亂沈浮
見聞總是吾家物好景何須著意求

次韻文士穎留題李子充雙寂軒詩

默默幽軒祇自知天人一理未容欺簷光坐揖青山入
窗影閒看白日移休道囂塵侵晏宅由來表裏湛黃陂
思惟泯處全真現存得靈龜笑朵頤

諸葛公則延登書閣出示焦丈通直洎諸公所

贈詩因成四韻

諸城葛氏久湮沈清尚知君獨遠尋
席卷承家猗頓術日明好古子雲心
珍藏高閣輕三篋善購多門小萬金
曾見墨莊耕穫利行看杞梓秀家林

同神泉縣尉遊海惠院登三惠閣有懷漢州同
官

出郭幽尋偶一欣初來猶未歎離羣
誰知蕭寺懸荒野却有層樓插暮雲
煙外遙岑仍隱隱風邊落葉更紛紛

天寒日薄牛羊下
遶樹歸鷗不忍聞

題遠色閣

倚杖從容日未曛
望中一洗兩眸昏
晴雲放出千尋嶺
喬木團成幾處村
東去西來長道路
春耕秋穫換郊原
無窮物象相吞吐
妙趣誰知在不言

次韻蒲大受同遊龍洞之什

尋幽一訪洞中天
路遶青溪水遶山
翠徑崎嶇行竹裏
紅塵咫尺背人間
侵裾爽氣冷冰雪
漱玉寒流鏘珮環

更問石庵窺勝迹斯遊豈復倦躋攀

次韻董守流杯池

巧思潛窺造化兒更依曲水鑿方池
靈鼇上釣喧紅粉輕鷗浮觴趁彩旗
落澗寒聲泉瀲灩弄花斜日影遲遲
分明作箇山陰會仍有當時幼婦辭

歸雲溪

九夏何知暑令行輕風拂拂水泠泠
只憑藜杖穿幽徑還喜蒲團憩小亭
散誕竹邊梳白髮徘徊江上誦黃庭

人間無此清涼處亦許兒童共乞靈

欽定四庫全書

雲溪集卷十一

宋 郭印 撰

七言律詩

忠州懷古

連日追遊笑語同一樽能遣百愁空
唐賢閣上秋風冷
巴子臺邊夕照紅
木落荒坡思白傅
草深頽墓憶宣公
只憐地狹難成市
依舊沙頭作小叢

留雲安驛詩

孤館幽幽一境清
晝長無事亦無營
睡頻推枕仍重起
坐久拋書却再行
靜看簷頭蛛結網
細聽屋角鳥翻聲
閒邊日月元如此
須信人間有赤城

八陣臺

八陣臺前水急流
累累石塚界沙洲
機深已盡吞吳策
事變空成守蜀謀
江月四時猶耿耿
雲山千古謾悠悠
天公若遂興劉願
功烈應非管樂儔

過小漢壩

地豁天開眼界寬
兩山相對列巔巔
多情煙樹連村暗
不事沙鷗照水寒
立馬躊躇饒野興
抗塵奔走尚簷官
歸來準擬江湖計
不負蓑衣與釣竿

漢州塔二首

萬象森羅眼底明
倚天高處喜重經
逶迤江練秋逾白
刻斲山屏晚更青
望盡平原煙冉冉
愁深古塞雨冥冥
躊躇欲看千燈後
手撥浮雲正極星

相隨步履轉穹隆
萬室鱗鱗指顧中
自笑情懷非曠士

誰知筋力已衰翁吟餘尚惜西山日立久飈憂北戶風
從此不須攀絕頂雲深無處認鼇宮

陪元允大受遊天寧寺詩

寂寂禪林繞篆香長廊古殿總虛涼
榎栴蔽日空交影烏鵲馴除不亂行
滅想自成清淨界爭機端作是非場
灼然祖意休生解炯炯寒燈一點光

總持院

曉霽同登古息臺雨師先為洒塵埃
紋楸戰罷仙蹤杳

清磬音傳佛寺開門外老松迎客入竹邊高閣放山來
逡巡攬盡風光去寄語三官不用猜

院有三官堂父老相傳昔有仙人弈

基於此即
三官也

合州菩提院和嚴夢錫韻

小刹遲留為覓船欲憑一葦下長川磬傳清韻每知曉
柏偃樛枝休問年末路風埃埋日月故園松竹老雲煙
由來行止皆天定遇坎乘流只信緣

宿覺空院用壁間韻寄王巨山

金方集卷十一
度壠穿雲十里遙招提蹲踞亂山坳地靈潛隱聖賢宅
林靜俯闕烏鵲巢萬法豈從心外有一真還向夢中交
世間出世元無別塵俗紛紛不用拋

元日有感呈正紀

情緒長隨節物遷老逢元日更悽然春風未省搔心曲
臘雪空留點鬢邊加我四年終易學長君一歲尚塵緣
何當同伏嵌巖下添取爐中住世鉛

立春

頗恨東風巧入簾不論朱戶與茅簷青春處處為誰好
白髮年年空自嫌市酒豈能供燕笑官娃無復問穠纖
強隨兒輩追時節菜壓香盤未損廉

正月八日至十二日雪不止和施仲任韻

天雨寶花呈上瑞不同常歲旋能乾癡兒詫見鹽成糝
戲僕圖搓玉作團漏屋茅簷垂欲壓華筵酒椀正禁寒
懸知片片非他物落處應須子細看

和錢叔凭長官京師新春即事

青門冠蓋近迎春物態天容旦暮新日暖御溝初破凍
雪消馳道未生塵曉煙暗綠金條眼佳氣晴浮碧瓦鱗
唯有紙鳶堪一噓掠天翔泳不由身

上巳曲水

良辰元已惜芳菲一笑林亭挽落暉圓吭高低齊獻曲
濃陰遠近密成圍穀翻細浪環池轉羽挾清觴傍席飛
不為不祥來祓濯欲因流水送春歸

次韻袁德夫春日書事二首

公餘蕭散步晴暉正是韶光懶困時官事暫能逃倥傯
物情深覺變神奇風傳小樹香浮砌水接平湖綠滿池
春草怪來成好夢西堂句法少人知

滿眼煙光困不勝羣紅委地綠堆林空庭鳥下簿書退
小院燕歸簾幙深千里故人縈午夢一樽新酒隔春岑
多情柳外鶯聲轉似向東風寫客心

和喻迪孺郎中春日書事二首

春風不入鬢邊青羞逐兒童趁晚晴花欲近人顏色好

鳥來窺戶語音清
鈎簾靜院山相顧
散策高亭月共行
自斷窮通天已定
休勞占數向枯莖

人間春思漫紛爭
祇把新詩喚曉鶯
妙處鐫鑱應鬼泣
醉中揮灑自風生
誰知雅道當今絕
獨與騷人並駕行
尺紙飛來光照夜
小窗申誦到參橫

春日雲溪即事二首

乞得筋骸伴老農
一丘春興有誰同
禽聲路入笙簧裏
花色人行錦繡中
薙草養蘭修故事
鑿渠引水著新功

義和叱馭應難挽愁見顛狂柳絮風

林壑棲遲兩見春一筇一麈任天真鶯花世界無停晷
電露光陰莫負身蟻戰蝸爭那復問魚浮鳥戲自相親
長江不日桃花浪築石牢堤急倩人

春晴二首

春工又是一番新滿目韶光欲醉人風喚鳴禽爭暖日
雨粘飛絮著香塵老來情緒元知別酒後形神始覺親
獨向小齋書咄咄無端燕子往來頻

二月垂楊長綠柯
漁村春塢景融和
沙邊細浪搖芳藻
水上紅雲映綠波
風裊釣絲時蕩漾
日移花影更婆娑
徑須展此連鰲手
且向樽前醉倒歌

道中得雨

暖律潛開四序先
土牛何處不施鞭
道逢宿雨連新雨
人說今年勝舊年
和氣薰蒸還率土
湛恩汪濊仰高天
甲兵一洗成豐稔
從此邊陲定帖然

孫希汲出示所和杜允迪二詩因次韻并寄允

迪以當別後一笑

草木藏春柳報先誰將蒼馭快如鞭夜中一雨知無價
陌上三農慶有年玉糝寒林梅委地浪翻平野麥連天
陰陽變理非吾事新歲調和豈偶然

和余時升周子美江雨有懷雨不絕詩韻各賦
一首

天作淫雨似秋中沾濕恐侵河伯宮螟螣欲傷禾黍秀
龜鼉尚快波濤風誰驅天際亂雲墨且放山巔晴日紅

有酒亟來相就飲流光一去大江東

右江雨
有懷

簷前萬點落珠璣乳燕梁間嫩學飛水滙百川人迹絕
苔封三徑馬蹄稀田塍溢溢禾生耳薜荔半綿垣有衣

江上何人清興盡却乘新漲棹舟歸

右雨
不絕

次韻卽子文感春之什

池塘不似昔年春蝶亂蜂狂更惱人莫傍花叢看婉婉
且懷詩卷誦清新山林祇管縈魂夢寰宇無端變却塵
遙想江東憂未歇可能熟醉巧謀身

送春

春色忽隨流水去
人間誰解絆風光
一聲杜宇乾坤隘
萬點飛花日月忙
道阻豈能游上苑
年衰無復夢幽塘
蜂情蝶意都蕭索
難化吾心一寸剛

次韻時升春盡之作

送春仍恨酒盃乾
今夕休眠到漏殘
歌舞縱無供笑語
賓朋猶有近門闌
傷心已訝千林綠
轉眼還看萬葉丹
節去節來君莫問
詩盟從此勿令寒

再和

紛紛滿地落紅乾
杜宇聲中春正殘
詩酒情懷公事汨
干戈時節賞心闌
生憎蔓草緣堦碧
却喜含桃向日丹
萬里吳天飛不到
劍光空射斗牛寒

和史守八月十四日月二首

月蘸澄江上下天
波光桂魄兩依然
喜延嘉客樓同倚
貪吸清輝席屢前
萬里無雲秋更濶
千門不夜曉相連
嫦娥且駐來宵駕
玉宇年年不列仙

半秋雲物掃遙天對月凭欄一憮然明夜半規應盡滿
此時清賞更無前瓊樓頗覺三山近玉斧誰將七寶連
我欲乘風霄漢上坐令凡骨變真仙

中秋佳月懷杜安行馮當可二首

西風捲盡片雲浮天宇團圓素月流玉斧修成三夜景
銀盤賽過十年秋佳人渺邈心相照羈客徘徊影共愁
安得仙娥一招手驅鸞駕鶴上瓊樓

絕勝尋常三五盈魄成金氣自然清煙雲斂迹秋空濶

星斗沉光夜色明
壁墮江心隨浪湧
鏡飛天面逐人行
四方萬里同清賞
大地今成白玉京

再和前韻

陰陽升降定沉浮
九候之前大火流
人遠祇同千里月
天高誰放一輪秋
飛螢眇眇何時見
驚鵲紛紛特地愁
陋屋窮簷無不照
清光豈獨射高樓

浙浙乾坤灝氣盈
多情明月共秋清
且將照席銀缸背
自有窺簷寶鑑明
但喜人心都愛好
誰知天度不留行

反身一視真奇特夜夜神光莫與京

次元守中秋觀月韻

青霄萬里絕纖毫海上仙人獨釣鼇
蕩蕩性天元廓落亭亭心月本孤高
寒光破碎穿幽徑素影飛翻入怒濤
但挹金波還洗滌不須遙望日生高

八月十四至十六日無月二首

秋中景色正蕭森月色超然重古今
要使萬方傾素采那知三日翳重陰
晦冥欲害天公眼想像難忘海宇心

決斷浮雲須好手明年此夕要追尋

不見團圓桂景森清輝一片本常今欲看靜夜千家晝
先掃長空萬里陰宇宙光明思佛掌兒童頓覺見人心
茫茫千里憑誰問每使良辰罷訪尋

十七日夜當可同去非觀月而子儀進道與僕
皆不在焉當可有詩輒次韻

月過秋色尚鮮賞心未厭惜流年瓊杯不許三人共
桂魄難同兩夜圓碧落無雲星避彩清輝滿座燭銷煙

新詩唱罷應愁絕影入珠簾照客眠

當可觀月有歸來清絕不成眠之句因廣其意

作五十六字

一別嬋娟便隔秋寒光今夕為誰流萬家窗戶人推枕
千里關山客倚樓酒欲忘懷難解醉詩將遣興却添愁
空堂耿耿渾無寐曉鏡看來易白頭

秋懷二首

西風獵獵動天關底事縈心撥棄難夜枕蛩聲連曉急

卷十一
暮樓鴻影落江寒遣樽酒渾消得遮眼文書亦倦看
物理盈虛元已定傷時何苦淚闌干

窗戶寒生不幕羅無邊愁緒費長哦有情尚覺天公老
不飲爭如月色何歲序崢嶸雙鬢改乾坤離亂一身多
年來懶讀悲秋賦忍聽商聲入詠歌

和元守重陽和韻

空樽獨把送斜陽九日何憂酒中傷客裏吟情尤寞寞
夢中歸意亦茫茫楓飄丹葉隨流水菊吐黃花犯早霜

惟有堅心松柏在四時不改色蒼蒼

謝道守董朝散臘日分惠採魚

臘日公塘命矢魚親迂五馬過康衢分波短艇金梭疾
綴網圓簪玉葉粗滋味盡教沾掾屬割烹不獨侑賓厨
從今下客休彈鋏不似馮諼恨食無

臘雪

好雪還從臘日飛空庭委積路淋漓寒深閉戶難延客
興發乘舟欲訪誰沒谷沉崖真快意撒鹽飛絮敢言詩

兒童詫見千山縞來歲豐登定可期

詠雪

上天連日擁愁雲曉起聯翩瑞色新
入麥未多三日雨著梅先報萬家春
興來賴有乘舟客喜極寧為閉戶人
安得梁王相命賦兔園避席少逡巡

次韻李堯俞良臣論交一首

深知不作昌時瑞成繭那能效野蠶
世態如雲從自薄交情若水定非甘
最憐炊黍張生約勿笑分財管仲貪

欲結他年漁釣友江湖舍我復誰堪

郭有道先生知命錄喜其擺落世塵去來自在
真神仙中人也用余時升韻附於羣公詩後

高標百世可廉頑喧處亡心心自閒小院客來風掃地
涼宵人靜月窺闌了知遊戲夢蝴蝶聊學逍遙歌泰山
須信先生今未死青冥鶴駕眇難攀

老境

怪來齒髮日凋疎坐閱春秋六十餘鬢雪難消休把鏡

眼花易發廢觀書身邊賴有三田實世上須知一夢虛
只辨此心羸造化浮漚起滅不關渠

張持道生辰二首

來自仙家白玉京秋穹灝氣欲平分人間莫道無先覺
天下須知有達尊豈但期頤稱上壽行看嬉戲弄仍孫
三溪自是蓬萊境陵谷遷移此獨存

西南英譽滿簪紳安富尊榮孰儼倫世上種成無限果
人間贏得自由身手提日月超千劫心隘乾坤等一塵

應笑盈庭爭祝頌兒童猶復詠松椿

壽湯總領

春色平分又六宵天生良弼佐皇朝
豸冠凜凜周行肅虎節煌煌蜀地饒
已喜月卿還舊物更看斗極轉高標
仁人自合超諸數鶴算龜齡未是遥

睿主寬仁徧九垓西南總計屬英才
一犁雨向田間足萬里春從天際來
洗盡瘡痍憑藥石調成鼎鼐得鹽梅
赤松有約應難老未信人間白髮催

宋正紀輓詞二首

振羽曾參上國鴻
偶飛不到廣寒宮
詩書教子心尤切
孝友承家德自豐
一命未酬耽學志
半途何負攝生功
新阡鬱鬱今埋骨
想見哀吟萬國風

姻好通來十八春
酒盃詩卷最相親
休心失約尋真侶
轉首誰知作古人
庵畔松篁長泣雨
室中書史暗凝塵
我嘗一訪經行處
白日蕭條倍愴神

范深父察推輓詞

榮國諸孫迥不同妙年英氣吐長虹
聖經每陋三家學文陣平收一戰功
可但芹宮滋教雨更看花縣暢仁風
詩書滿腹成何事惆悵舟移夜壑空

弔宇文道可

居閒共喜迹相親桑戶誰知遽反真
三紀周旋渾作夢一樽離別倍傷神
舊邦猶憶江山主新圃俄摧草木春
陰德降祥天報定高車駟馬豈無人

彭公堂

一瞻遺像起遐思慶厯風流想見之政化寬平無後日
文詞純質似當時溪山寂寂人何在林沼依依澤未衰
堂共灘名俱不朽十年清節斗星垂

池乃公所鑿

王夫人輓詞

吁嗟蘭德已雲翩空見佳城在九原無祿久虛南澗藻
有姑誰慰北堂萱苦荼獨御安天命暝日同歸信誓言
諸子欲知遺恨事隴頭長聽水潺湲

申夫人輓詞

鳳去驚隨事可傷
唯傳婦道式閨房
紫簫吹月元同上
寶劍凌波亦並藏
南澗蘋餘空自老
北堂萱在為誰芳
幸哉有子遵遺計
外氏猶能謹祭嘗

明上人感碁不已作詩贈之

未然一著最玄微
黑白分明會者稀
但向死中求活路
莫於平處鬪玄機
勢強失利緣輕敵
力困收功為解圍
勝負紛紛成底事
不如完璧早還歸

再用前韻

禪宗詩律造精微眼底紛紛識者稀舉世何人談大道
憐君與我叩玄機休誇修煉飛金闕勿笑沉淪陷鐵圍
善惡兩途俱是錯堂堂日用要知歸

和許覺民塵尾筇竹杖

拂穢清塵志自殊斯文危弱更當扶嘉言疊疊手當御
高步徐徐身與俱驅犢幾曾遭戲笑化龍應亦在斯須
龜毛兔角人人用莫道吾家此物無

和榮安中道中見梅

春來無奈客愁新一破衰顏粉面勻笑折繁枝頭帶雪
想成青子頗生津真香未許蘭為佩仙質何妨縞作巾
勿怪天公多著意為憐風韻冠羣倫

再和

雪裏寒梅歲又新粘枝的皪已開勻行人邂逅先傳信
枯卉逡巡欲問津他日調羹憑傳鼎此時漉酒借陶巾
粉腮紅跗休輕放醉賞從人笑伯倫

紅梅

姿韻清高自一家不將天艷喚蜂衙衝寒萬木渾無葉
回暖孤根獨放花要與雪霜爭皎潔肯隨桃李趁繁華
更看結實調羹在疎影寒香未足誇

山茶

枯林獨秀染胭脂不使羣芳次第窺月桂殷勤來並色
江梅寂寞許同時霜飛雪舞終難挫蝶隱蜂逃各未知
折得一枝聊慰眼兒童拍手誤春期

欽定四庫全書

雲溪集卷十二

宋 郭印 撰

五言排律

上卻尚書

代人

康節名天下流芳到子孫
素風門戶遠皇極典型存
萬邑紛戎馬十年辭帝闕
家艱俄茹苦國難更堪論
上念長城寄兵分細柳屯
紫泥頒詔綉墨經總戎
軒權重將軍幕忠求孝子
門江朝南海濶星拱北辰
尊智勇張良

足詩書却穀救邊儲裁冗蠹邦本厚黎元士仰蘇天覆
人依趙日暄勢增師旅氣威讐虎狼魂帳幄稽前箸山
河暫偃藩精誠扶日月談笑整乾坤賤子欣蒙庇先君
舊感恩駕轅憐病馬投木笑窮猿

案投木笑窮猿之扶
下疑脫去一韻

搖如可借短翮待騰騫

和時升貽齋閣十韻

吏塗何就窘士節要安常逐物終迷路看書免面牆借
鄰通隙地對壁敞幽房架插三冬史爐薰一炷香叢蘭

分晚吹疎竹罇晨光濟難嗟無策攻愁賴有方稍知休
簿領誰暇刻封章池草春成夢案螢秋滿囊良朋來款
曲佳句為鋪張功業奚須問前賢擬杜康

時升詠雪效前人體盡禁比類顏色等字率予
同賦用其韻

豐年真可必時雪降今冬飛霰紛紛集同雲幕幕重爐
深添熾炭寺遠隔疎鐘先壓窗前竹難分嶺上松畫樓
欺酒力幽徑滅樵蹤蓑笠看漁父鉏犁慰老農穿簷寒

正苦布野潤宜濃梁苑思重賦袁門想半封龍沙猶張
王虎士莫驕慵吾土端無恙天公久見容

五言絕句

春日即事

鳥詠短長句花呈赤白章化工非不巧閒客笑春忙

苦熱和袁應祥用韋蘇州喬木生夏涼流雲吐

華月為題十小詩

早魃難除遣南箕未可招安能颺雙鳥飛去學王喬

山深隱麝磨江寒亂鷗驚我欲從之遊形骸元土木
黃昏蚊撲撲白晝蠅營營天地一紅爐幾人得聊生
桃源渺何所不知有冬夏堪笑市朝兒炎涼爭代謝
倚杖長松底無風晝自涼吾廬傍林壑嘉木聳千章
酷熱無從避天風幾日秋寸陰不知惜大火急西流
赤日爍行路青天絕片雲安得一丸藥立返暍死魂
中扃自清涼穿鑿多門戶神凝一氣歸陋哉勤納吐
呼吸一寒暑三界本無家人間自火宅未老髮先華

古人夏造冰秘訣從誰發胸次幹乾坤手中提日月

既為誼夫賦墳廬詩乃蒙和韻再成十首為謝

兼簡韶美以資一噓

案墳廬詩十首原本缺

秋螢腐草化芝菌出枯朽形質但變遷中有一物久

大道無關鍵人人悉可窺超然明日用了不礙云為

伏羲畫卦後文字積丘山誰知聖人意要妙唯一言

仲尼作六經中遭秦火厄畢竟不可磨尊道而貴德

黑白未分時幾人知此著一著只這是為子說崖畧

忘機海上遊鷗鳥下為侶入山莫怖畏猛虎即是汝
法法本來空無垢亦無淨直向異類行何曾失正性
漏泄春光處山寒已放梅癡兒元不識須待百花開
相逢無間隔萬里一天風與子元同姓何勞問祖翁
辯嗟孟軻勞清笑伯夷隘秋毫滿六虛須彌藏一芥
題獨有堂詩

俯仰天上下尊稱唯我獨無物亦無人本來真面目
遠色閣二首

遐觀目力窮莽蒼雲山礙儻知色非色坐見六合外
高人了色空法界無近遠客來一登臨正好高著眼

遜齋

念念等空寂行藏鬼莫窺是名真遜者安用山林為

博古齋

撐腸萬卷書不知何處著寄語腐脣人於茲宜領畧

題爽軒詩

心澄氣自爽滿目是青山欲知拄頰意一笑可忘言

題朝徹軒詩

玉兔夜夜明金烏朝朝徹吾身有神光大千韜日月

題三士軒詩

獨立未為真萬法皆吾侶故於竹柏間強名相爾汝

追古亭

結茅覆短椽仁風追太古回視輪奐美唾笑如糞土

題寒碧亭

炯炯練千尺蒼蒼玉萬箇客來魂一清四顧不敢唾

和光亭二首

有愛即耽著竹色共花光何似無心人堯桀兩相忘
川原萬草木總放無量光要識和同意乾坤不閱藏

雙清亭

水竹兩奇絕客來安此名那知汙穢裏識得是真清

梅臺

百藹照春臺標名只取梅道人寧揀擇聊記雪中開

忘機臺

物物皆有機此發彼先知試看弋釣子魚入鳥高飛

萬松嶺

高岡立萬松晨夕鳴天風法法如是說應不負山翁

直鈎潭

臨深投綸竿直鈎本非釣欲釣聖賢心默坐得其要

再作雲溪

脩篁衛長江雲氣自翔集中有無心人片雲隨出入

又賦

曳杖推門去問訊西溪雲超然入境異佳氣日氤氲

龍淵二首

蟄龍道已成升降得自在淵無百尺深竅穴通滄海
爪牙了不露誰能見其蹤超忽變化處即此是真龍

御風橋

是身如虛空風馬時獨御青天手可捫便欲飛騰去

衆香橋

修證彼何人有國號衆香此境了不殊沉檀藹飛揚

無盡橋

園林作佛事施子不少各携筇渡一溪華藏愈無盡

浮翠橋二首

竹底寒流駛幽深客可招壺中無盡景更渡一浮橋
竹間有寒流四面浮蒼翠何必駕層空蕭蕭盡秋意

挾仙橋

一間猶未達惜哉千種仙我欲挾之進俾見天中天

虛舟二首

浮遊世界海無心舟自虛簸蕩從滔天不管風濤虞
野航一逍遙湖海意自足翩翩犯斗牛誰謂推平陸

大自在庵

茫茫三界中何處不自在情存想未除轉側成拘礙

金仙道中徒步

路經新雨滑山帶宿雲昏草履吾家物相將過別村

池蓮

擢幹誇池中天姿本清淨白白與紅紅邂逅識真性

蘭

幽人紐為佩不為香與色
秋菊暨江南未可比君德

七言絕句

張都統懷古四首

慇懃圯上一編書
漢四百年歸卷舒
晚節莫教閒辟穀
皇王事業豈難如

控弦誰敢與爭鋒
細柳將軍眼自空
拊髀何須長歎息
分明頗牧在雲中

人言諸葛事功難八陣堂堂指顧間認得君臣魚有水
箇中蛇勢似常山

世濁求清笑屈平時清把釣詫嚴陵行藏有道君應解
獨倚危樓高處層

和馮當可

相逢不作少年看老著衣冠各強顏明日龜陵分手後
音書又隔幾重山

正紀誕辰輒成三絕句為壽所謂壽者非世俗

之壽也蓋期君道學堅固將與造物者遊無終始者為友而已

復卦初爻寓意深祇緣虛靜見天心君生正遇黃鍾律
宜把真陽却衆陰

中冬蟾彩八分圓可是人間誕謫仙怪得心光吞萬象
鑄鏡造化付詩篇

歲月推來逢子午坎離交處互乾坤休將世法論脩短
超出陰陽道獨尊

夔州元宵和曾端伯韻四首

綺陌家家不下簾
花光世界總成蓮
村歌社舞歡呼處
都道今年勝去年

遊子何須念故鄉
酒酣聊發次公狂
人生行樂真佳耳
休苦棲心名利場

華燈下上照樓臺
無數銀花一夕開
月色多情能助興
遊人去了却重回

斗轉寅初月正中
昏燈達旦九衢通
漢家祀事傳來遠

想見當時太一宮

次韻曾端伯早春即事五首

春風著物便超搖已覺三陰次第消
明日江梅吹盡雪却看芳草似裙腰

士女梅花插滿頭一川人日恣嬉遊
賢侯可是知民意特地江干駐碧油

一聲幽鳥解呼春物逐新年氣象新
坐閱羣生空擾擾身如槁木是何人

九畹春回未放蘭先饒堤柳變衰殘陰陽代謝尋常爾
正好隨流著眼看

使君千騎出重城對鏡心閒似水清豈但邦人安善政
波間鷗鳥亦無驚

又次曾端伯春日韻四首

瑞白春前已見三向來膏雨物頻霑山城二月寒猶峭
生怕東風巧揭簾

誰言堤柳勝江梅榮謝紛紛付酒盃春去春歸何足問

陽鳥東出又西頽

韶光蕩漾眼雙明
問柳尋花步履輕
波暖浮鷗翻素影
風和幽鳥弄新聲

先生胸次艷千春
鬢綠顏紅未老身
松柏歲寒終不改
謾隨百草鬪芳新

春陰

膏澤乘時要發生
雲師可是太無情
朝朝只解連空晦
好雨終慳造不成

感旱二首

大旱如焚氣不蘇
雲師誰遣上天衢
人人準擬為霖甚
風動雷行雨却無

黯黯漫空雲四垂
飄風何事一時吹
天公豈是無情者
人物焦乾總不知

望雨

秋杪陽光熾若焚
了無陰翳徹朝曛
天公有意憐行役
乞與空中一片雲

和厚卿雨涼午睡二首

一番驟雨洗驕陽
秋色先貽枕簟涼
正作故山歸夢好
覺來幽恨獨何長

疾風吹雨打窗時
客睡昏昏半下帷
快意平生渾一榻
是中真樂幾人知

秋日即事八首

巴山今日見清秋
河漢無聲天際流
我亦乘槎問牛斗
此心剗盡一虛舟

風到秋宵特地涼，卧看斜月半侵床。
來寒往暑誰能問，歸燕賓鴻各自忙。

淺淺溪流綠一灣，朝來拄頰看西山。
憑誰與我驅風馭，飛上雲煙縹緲間。

籬邊準擬嗅清香，菊蕊真同佛面粧。
屈指重陽能幾許，夜來寒露已為霜。

向來玉燭四時和，共慶秋田黍稌多。
但得貧民同一飽，黃堂無事且婆娑。

一片澄心似太清浮雲了不礙虛明夜深人寂渾無寐
時聽空庭落葉聲

新築茅廬古道傍養成松竹可深藏西風頗動歸歎興
不是悲愁賦感傷

自學心齋室久虛年來破蕩一無餘春花秋葉非吾事
默坐焚香讀道書

次韻當可觀雪

天將瑞雪灑乾坤世界渾疑色布銀人說豐年猶細事

邊庭先喜蕩烟塵

馮當可遊龍鶴山有詩贈安道人用韻二首

一到仙山眼自明
前身髣髴記曾經
真人眇習在何許
更隨藜杖緣青冥

君今宴坐澄神谷
萬象之中能見獨
功成白日上層霄
莫忘飛來兩黃鵠

宿古峰驛詩四首

崎嶇戴月上層峰
擬借空山一夜風
爽氣襲人衾簟冷

炎天此地即仙宮

故移一榻就高峰推戶褰帷獵獵風骨冷神清渾不寐
直疑人犯廣寒宮

拄杖穿雲到古峰月高天淨欲乘風人間原有清涼地
好作茅茨一畝宮

夜半飛來海上峰笙竽萬籟奏天風素娥相望如招手
欲駕神車上月宮

金仙道中徒步



欲稅肩輿未得休，且憑竹杖到山頭。
疎林向晚投歸翼，滿目寒煙醞客愁。

相思寺迦葉佛腳跡詩

巨跡相傳歲已深，往來遊客好追尋。
誰知此足本非履，胡不返身求佛心。

送宗泰住成都正法院四首

道人活計等虛空，城郭山林處處通。
隨緣應現水中月，萬壑千潭一照同。

凡情但以俗眼觀妄義阿師取舍間豈知片雲不掛天
一來一去心長閒

少城衲子紛如粟攘臂叢林空逐逐忽然象罔得遺珠
契詬離婁何面目

師今攜錫下孤峰似聞猿鳥含愁容胡不為言我常住
東西南北總相逢

次韻劉文饒題絕塵亭詩

斜斜遠樹繞江頭十里平波似不流更欲尋源穿窈窕

一蓑煙雨羨漁舟

題蘇村酒家亭

下馬穿橋憩酒家
小溪清淺蘸桃花
紅塵咫尺如相背
獨坐幽亭對落霞

招仕孝叔蒲明之江亭對月

高亭對月影成雙
客舍何人共酒缸
今夕相邀同一醉
坐看金餅落澄江

和杜安行南湖泛筏詩

翩翩小筏穩如船十畝平湖碧浸天不待乞身追賀監
君今已是吏中仙

漁舟

細雨霏霏下釣臺衝煙小艇截江來不知取得魚多少
鼓棹如飛喚不回

戲投竹葉急流中

戲投筠葉赴湍流顛倒縱橫不自由我亦江湖飄一葦
千波萬浪信沉浮

清水鋪瀑布

飛泉濺石落寒岩更喜朝來一雨添疑是玉姝離洞戶
故垂千尺水晶簾

和計敏夫留題雲溪

知君絕學謝塵編語默行藏不礙禪親到雲溪重說偈
天開地闢見純全

問漢守劉寶賢覓酒四首

酒幾於道少人知乘墜俱忘即我師身後虛名如勝此

陶潛李白更無詩

不到房湖已數年
麴生風味想依然
使君醞藉真無敵
欲向樽中識聖賢

村沽無復見瑤漿
苦澁酸辛已備嘗
欲洗野人藜藿腹
除非金鴈送鶯黃

雖無斗量敵山濤
時復中之興自高
醉裏醒醒方解飲
勿將佳趣語兒曹

計敏夫送酒四壺有詩和之二首

萬象森羅總是詩神機一動即天隨寒梅把酒真遊戲
妙意縱橫十二時

何須著意苦吟詩未動毫端萬景隨千載騷人還把手
誰云陶謝不同時

次韻邵公濟尋梅三首

素艷遙憐月色同暗香披拂有無中一枝已覺春光破
不恨南鄰笛裏風

獨與幽人臭味同細看詩句酒杯中霜林萬木無顏色

只有孤標傲曉風

天與幽姿自不同
凌寒獨秀雪霜中
山茶未許方高潔
故使千花立下風

次韻探梅二絕

淡妝曾記出疎籬
歲晚南枝的皪稀
後夜月明如破萼
暗香還是著人衣

祇從地底一陽來
已把東皇次第催
煙縷未看原上柳
霜苞先探嶺頭梅

正紀見遺梅花云春信數枝輒分風月以助清
樽而一樽無有也戲成兩絕贈之

水中疎影月中香枯樹前頭獨自芳不有幽人時賞翫
誰傳春信及寒香

風月憐君幸見分老年春事正堪論花枝照眼成惆悵
欲洗愁城欠一樽

再和

月夕霜朝分外香故將顏色占年芳一枝贈我春何許

如在江南雲水鄉

欲把羣葩次第分
桃麤杏俗未應論
寒梢清絕世無比
且趁繁開倒綠樽

次韻宋南伯梅花

天姿不與百花鄰
枯木前頭獨自新
桃杏滿川渾未識
猶將顏色鬪青春

梅影

斜斜曾向溪邊見
淡淡還從月下看
那得世間三昧手

為君寫出一枝寒

落梅

春風著物渺無蹤
草木勾萌處處同
唯有江梅都委地
只留青子調殘紅

時升見惠芍藥三朶作詩謝之二首

百花零落已成塵
聞道君家解繫春
艷質嬌嬈應見慣
肯分粲者遺愁人

婢妾紛紛只謾爭
美人後出更傾城
東君可是多情思

留取妖容作餞行

芝產之五日有雙蓮生於東池亟往視之出水
已二尺許園人云亦旦日所抽莖也復作三詩
紀焉

紅幢翠蓋插方池中有駢花並一枝聖澤汪洋招瑞應
小臣螻蟻豈能私

七層芝草煌煌秀一本荷花兩兩芳無象太平人不識
天教卉木效珍祥

岐麥嘉禾兆慶符同莖合幹復芙蓉
渠鋪張偉績吾曹事
苦恨無才可屢書

和龐次甫秋日海棠二首

誰將暖律入寒菱紅染枯枝特地開
可是仙人顏不老
霜朝喚得臉朱回

懸知草木太鍾情秋晚花梢照眼明
我已無心齊槁木
莫將妖態見春榮

謝友人惠菊

黃金勝友惠然來佳節相逢酒一杯風味依依如舊日

只驚霜雪鬢邊催

駱賓王重陽尋菊序
白帝俱秋黃金勝友

水仙花二首

琉璃擢幹耐祁寒玉葉金鬚色正鮮弱質先梅誇綽約
獻香真是水中仙

隆冬百卉若為留獨對冰姿不解愁誰插一枝雲鬢裏
清香渾勝玉搔頭

又和

金少曰：卷十二
披風擎露曉光寒，玉立霜階照碧鮮。
誰遣翩翩離海底，寶釵交映翠羣仙。

湘娥故把玉鈿留，能為幽人一洗愁。
不似梅花枝幹古，凋年寂寞暮江頭。

池萍

楊花撩亂幾時休，看取明朝水上浮。
凝綠滿池渾不動，微波忽綻見魚遊。

有鳥褐色而羽如青錦，解作諸般語。
一卒蓄之

籠中頗拂其性俗名山和尚為賦一絕

錦作雙翰褐作衣雕籠蓄養亦多時只緣學得千般語
欲返山林未有期

鴉

勞生日日帶煙歸繞樹呼鳴擇一枝素月流天元未曉
何須半夜苦驚疑

蛛網

結網謀生用意深可憐微物有機心世間欺奪休驚詫

鬪巧爭奇古至今

六言詩

和曾端伯安撫勸道歌

保形保生保命戒色戒酒戒茶夜氣若要長在晚食尤
宜減些養心莫如寡欲存誠唯是閑邪辨得天清地濁
吞取日精月華寒灰便是發焰枯根立可生芽學者捨
本逐末病眼執著空花罔窮聖道一轍徒誦丹書五車
正似鍊和金鑛何殊嚼蔗吞查不知達人到此元始浩

劫為家燕坐能事畢矣行遍海角天涯鑑明不受微垢
玉潔靡見纖瑕視軒冕如桎梏棄財寶若泥沙曲江一
輪秋桂豈容霧掩雲遮盤旋火龍水虎和合陰汞陽砂
真身自然騰化駕鳳高凌紫霞哀哉傍門小法作用千
種參差箇箇辛苦無成白首空自悲嗟

和曾端伯安撫養生歌

大道靡涉多歧迷塗爭求捷徑采御未免瑤精道引止
能祛病服食一藏偏強燒煉千金或罄紛紛小法小功

往往匪清匪靜那知反照內觀專在致虛守靜況始生之神氣即本來之性命源深其流必長根固其葉斯盛剗心自契真空滅息終成大定謂虛固可集道非睿不能作聖夫人受中以生惟我獨得其正斡旋天地之機提契陰陽之柄每嗟坐禪學佛有似磨磚作鏡聚塊積塵非理槁木死灰失性直須大用見前方是真仙究竟不生故能生生古語由來堪聽

再和二首

魚跳須過龍門虎驟不從兔徑上士聞道勤行豈以難
能為病固守滿堂之珍肯使如瓶之罄對境一念不萌
應緣六根皆淨剛克本自沉潛動直先由專靜達理必
明其權盡性以至於命鼎中水騰火降爐內陰衰陽盛
神功妙合虛無天光潛發泰定豈惟出塵離俗便可超
凡入聖自憐末學多方未得大中至正莫知幹運帝車
寧解執持坤柄丹經苦閱殘編素髮羞看明鏡要求直
截真機速了圓明正性何妨萬兩金成已是一生事竟

至言今許發蒙三沐三薰諦聽


涉海必假舟航登山當尋蹊徑每歎修身錯路譬如飲藥如病逢人須是問津有心未免擊磬沉遇先覺先知早明不垢不淨七情渙若冰雪一性湛然淵靜虛無體道合真恬淡樂天知命外之寇賊消亡內焉邦家昌盛初守一以處和乃無事而生定教不倦稱乎仁德分人謂之聖故玉非琢不成惟木從繩而正要明師指藥物藉元神為本柄大道多歧亡羊至人用心若鏡何妨常

善救物免使大惑易性門庭既已趣入根株亦須窮竟

直至出死超生方知聾者善聽

案前二首俱押聾字韻此首有心未免擊聾句

聾字
誤押



欽定四庫全書



卷十二